

समा - 12:25 hrs.

<><><><><><>

Shah-JK Floods

केन्द्री गृहमंत्री अमित शाह होरें आक्खेया ऐ जे केन्द्र सरकारै प्रदेश आपदा प्रतिक्रिया कोष SDRF लेई 2 अरब 9 करोड़ रपे दी रकम लॉट कीती ऐ, जेदे कारण इत्थे हाड़े ते बरखे करी मती तबाही दे बाद राहत कम्म शुरु कीते गेदे न। अपने जम्मू दौरे दे दौरान कल अमित शाह होरें राजभवन च इक दे बाद इक कैई बैठकां लोआइयै हालात दी समीक्षा कीती, पैहली बैठक च बरखें, हाड़े ते बददल फटटने करी होए दे नुकसान दा जायजा लैता गया। इक होर बैठका च BJP दे प्रदेश अध्यक्ष सतशर्मा (C.A) हुंदी अगुआई च पार्टी दे सांसदे ते विधायकें कन्नै हालात दी समीक्षा कीती गेई। एहदे इलावा अमित शाह होरें बड़े सुरक्षा अधिकारियें कन्नै बैठक लाइयै सुरक्षा हालात दा जायजा लैता।

<><><><><><>

LG -Floods

उपराज्यपाल मनोज सिन्हा जेहड़े कल गृहमंत्री अमित शाह हुन्दे कन्नै जम्मू दे बक्ख-बक्ख हिस्सें च हाड़ें ते बरखे कारण प्रभावत इलाकें दा दौरा करने गेदे हे, होरें आक्खेया ऐ जे हालिया कुदरती क्रोपियें च अपने परिवार दे जीएं गी मोहाई चुके दे ते बरखे हाड़े कारण नुकसान ते दिक्कतें दा सामना करा रदे लोकें दे कन्नै उन्दी पूरी हमदर्दी ऐ। एल.जी. होरें आक्खेया जे प्रधानमंत्री नरेन्द्र मोदी ते गृहमंत्री अमित शाह होरें प्रभावत परिवारें गी तौले शा तौले हर मुमकिन मदाद उपलब्ध कराने दा भरोसा दोआया ऐ। उन्नै आक्खेया जे मौसम दी मजूदा स्थिति गी ध्यानै च रक्खदे होई सभ्भनैं जिला सतह दे अधिकारियें गी निर्देश दिते गेदे न जे ओ पूरी चाल्ली सहोगे ते सतर्क रौहन ते जमीनी हालात पर नेइमी तक्क बनाई रक्खी जा। उन्नै लोकें गी बी आक्खेया जे ओ सुरक्षत थाहरें पर गैं रौहन ते जरूरी एहतियात बरतन।

<><><><><><>

NHW Closed

बनिहाल ते एदे आले दोआले दे इलाकें च जारी बरखा दे चलदे जम्मू-श्रीनगर राष्ट्रीय जरनैली सिड़क गी गड़्डियें दी आओ-जाई लेई बंद रक्खेया गेदा ऐ। आकाशवाणी दे जम्मू संवाददाता मुजब जंदे कल मौसम च दना सुधार होने दा बाद बता फंसे दियें गड़्डियें गी लंघाने लेई कल 6एं दिने दे बाद जरनैली सिड़कें गी अद्दे-दुब्बे तौरा पर खोलेया गया हा, पर रातीं थमां परतियें लग्गी दी झड़ी दिक्खदे होई अज्ज कुसे बी गड़्डी गी सिड़कें पर जाने दी इजाजत नैई ऐ। ट्रैफिक मैहकमे नै लोकें लेई सलाह जारी कीती ऐ जे ओ सिड़कें दी ताजा स्थिति बारे जानकारी हासल कीते विजन सफर लेई नैई निकलन।



Vaishno Devi Yatra

खराब मौसम दे चलदे श्री माता वैष्णो देवी जी दी यात्रा अज्ज उप्परोतली 8में रोज बी बंद ऐ। आकाशवाणी दे जम्मू संवाददाता नै जानकारी दिती ऐ जे लगातार बरखा ते पस्सियां पौने कारण माता दे दरबार गी जाने आला रस्ता यात्रा लेई सुरक्षित नैई ऐ जेदे कारण प्रशासन गी इसी बंद रक्खने दा फैसला लैना पेया ऐ। यात्रा रोके जाने कारण कटरा च सुन्मसान पेदी ऐ ते टावे-टावे मकामी लोक गै बाहर बजारें च दिक्खे जाई सकदे न। अधिकारियें दा आक्खना ऐ जे मौसम पूरी चाली ठीक होने ते यात्रा रस्ते दी सुरक्षा यकीनी होने दे बाद गै यात्रा ब्हाल करने दा फैसला लैता जाग।



Doda Floods

डोडा जिले च ताजा बरखा ते हाड़ें कारण 5 जनें दी जान चली गई ऐ। अधिकारिक जानकारी मुजब 89 मकान पूरी चाली तबाह होई गेन, 111 मकानें गी बड़ा मता नुक्सान पुज्जा ऐ ते 438 मकानें गी अद्दे दुब्बे तौरा पर नुक्सान पुज्जने दी जानकारी ऐ। डोडा दे जिला विकास कमीशनर हरविंदर सिंह होरें आक्खेया ऐ, जिन्दे परिवार दे कुसै जीह दी जान गई ऐ उनेंगी SDRF दे नियमें तैहत 5-5 लक्ख रपे दी सीधी सहायता उपलब्ध कराई गई ऐ।



Weather/Sch Closed

जम्मू खिते दे बक्ख-बक्ख इलाकें च कल रातीं थमां होआ रदी लगातार भारी बरखा कारण लोकें दी रोजमर्रा आली जिन्दगी पर माड़ा असर पेया ऐ त थाहरें -थाहरें पर सिड़के पर पानी किट्ठा होने करी लोकें गी औने-जाने च परेशानी दा सामना करना पवा रदा ऐ। तुंआई मौसम विभाग नै अज्जै आस्तै जम्मू-कश्मीर च भारी बरखें दी भविक्खवाणी कीती दी ऐ, जेहदे कन्नै संवेदनशील इलाकें च हाड़ औने, लास-पस्सियां पौने ते बददल फटट्ने दे बी आसार दस्से गे न। मैहकमे नै अज्जै लेई जम्मू डिविजन दे किश जिले च भारी बरखें दी चेतावनी जारी कीती दी ऐ। लोकें गी सलाह दिती जन्दी ऐ जे नदियें, नालें दे कंडे नैई जान ते कुसै बी आपदा आली स्थिति दौरान 112 नंबर उप्पर फोन करियै राबता करन।

तुंआई स्कूली शिक्षा मैहकमे नै अज्ज जम्मू-खिते दे सब्भनै सरकारी ते निजी स्कूलें गी बंद रक्खने दा हुकम जारी कीता ऐ।

<><><><><><>

PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां न। इच्छुक आवेदक जेहदी उमर 24 थमां 50 बरें दे बश्कार ऐ ते ओह जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंध्यत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 14 September 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>